

105, 23.

Eine Leichpredigt/

Za  
1324a

# Wey dem Begrebnis

Oswaldt Bartels eines Bergmans/  
welcher im Jahr 1507. zu Ehrenfriedsdorff / im  
Berg/der Semberg genand/ vorkallen/ vnd vnvorsehens/ im  
68. Jahr/ den 20. Septemb: noch ganz funden/ vnd von  
der Erbarh Knapschafft daselbst/ Christlicher weisß  
zur Erden bestetigt worden/

Gethan/

Durch M. Georgium Raudte/ dazumal  
des orts Pfarrer.



IS

99.

Jetzt und auff begern gutherziger Christen/ zur Lehr vnd Trost/  
für Christliche Bergleute/ auch zum gedechenis/  
in Druck gegeben.

Gedruckt in der Churf. Sächsischen Bergkstadt  
Freiberg/ bey Georg Hoffman.



BIBLIOTHECA  
MUNICKAVIANA

UNIVERSITÄT  
MAGDEBURG  
(SAALE)  
BIBLIOTHEK



Vns dem XC. Psalm.

**V**ER du ledest  
die Menschen dahin faren  
wie ein Strom / Sie sind  
wie ein schlaff / Gleich wie  
ein gras / das doch bald welck wird / das  
da frühe blühet / vnd bald welck wird /  
Vnd des Abends abgehawen wird vnd  
verdorret.

**I**hr lieben Christlichen Bergk-  
Leute / Ihr höret offte gedenccken des  
Sprüchleins im 91. Psalm: Der Herr  
hat seinen Engeln befohlen vber dir / Das sie dich  
behüten auff alle deinen Wegen. Welchs denn euch  
allen ein sonderlichen grossen trost geben sol / in ewi-  
gen sorglichen vnd gefehrlichen Beruff / Stand  
vnd Arbeit / das Gott der HERR euch seine lie-  
ben heiligen Engelein / als die himlischen Steiger-  
lein / die sich auff der Jacobs farth haben sehen las-  
sen / sind daran auff vnd niedergefahren / Gen: 28.  
zugibt / in ewern ein vnd ausfahren / vorm Ort / in  
Stöllen /

Erwollen/ Echchten/ Strecken vnd Tieffesten/ vor  
den Bergteuffeln zu behüten/ so fern ihr ewers  
wegs oder Berufss trewlich warnemet/ vnd euch  
Christlich vnd trew mit beten/ Gottesfurcht vnd  
arbeit darinne erzeiget vnd verhaltet/ Wie auch  
im Psalm 34. steht: Der Engel des **HERREN**  
lagere sich vmb die her/ so ihn fürchten. Denn  
wenn es ohne der lieben Engelein gegenwart vnd  
schutz were/ würdet ihr wol ein aber schwerlich wi  
der ausfahren. Das sollet ihr lieben Bergkleute  
erkennen/ vmb diesen schutz vnd beystandt der heil  
igen Engelein allzeit herzlich beten/ Gott dafür  
stets danken/ vnd euch also vorhalten/ das ihr sie  
nicht betrübt/ verjagt/ vnd ihres schutzes euch selbst  
beraubet/ Im fall aber/ da Gott gleich bisweilen  
ein Auge zu thut vnd vorhengt/ das mancher scha  
den nimbt/ oder gar vorselet/ geschicht es doch nicht  
allemal zu einer straffe/ deme so es widersehret/ son  
dern euch zu einem augenscheinlichen Beispiel vnd  
vormanung/ das ihr in Gottesfurcht sollet wan  
deln/ vnd in ein busfertigen leben vnd wesen euch  
finden lassen/ Vnd bedencken/ was Christus sagt/  
Luc: 17. zu denen die ihme verkündigten das der  
Thurn in Siloa were eingefallen/ vnd hette etliche  
erschlagen/ Meynet ihr/ spricht der **HERR**/ das dies  
selbigen sind schuldig gewesen vor allen Menschen/  
Ich

Ich sage/ Nein/ Sondern so ihr euch nicht bessert/  
werdet ihr alle auch also umbkommen.

Von denen aber die im Berge oder Gruben  
vorfallen vnd umbkomen/ also/ das sie schwerlich  
auch wol gar nicht können gewonnen werden /ste-  
het dennoch auch in Psalm 34. Der HERR bewa-  
ret die gebeine dere die in fürchten/ das dere nicht  
eines zubrochen oder verloren werde. Wie sich denn  
die lieben Engelein bey dem heiligen Grab ihres vnd  
vnseres HERRN Christi haben sehen lassen/ nicht  
allein zum zeugnis der warhafftigen Auferstehung  
Christi/ sondern auch zu ein sonderlichen trost/ das  
sie als die himlische Steigerlein oder Hutleutlein/  
sein wollen/ auff der Todengruben vnsern Grebern/  
da wir alle Gewercken sind/ vnd wollen vnser bein-  
lein vnd steublein sein zusammen halten vnd bewah-  
ren/ Bisß sie am Jüngstentag wider gewonnen  
werden.

DEssen meine lieben Freunde/ haben wir nu hie  
ein augenscheinlich Exempel/ das dieser Bergman  
oder Steiger/ welcher vor 46. Jahren im Gew-  
berg vorfallen/ wie etliche Alte so es gedencken/be-  
richten/ vnd bisßhero offtmals darvon gesagt wor-  
den ist/ Auch niemand vernünftiger weis anders  
hat dencken können / denn das weder Haut noch  
haar/ Kleider oder gebein/ würde von ihme zuffin-  
den

den sein/ Wenn man auch schon in den ort da er  
vorfallen / niederschläge / wie ihr pflegt zu reden/  
den hat man am nechsten vorschienen Montag (wie  
er denn auch an einem Montag sol voffallen sein)  
gantz wider funden / in seiner ledern Bergkappen/  
wie man sie zur selben zeit getragen / vnd vnvorwe-  
senen kleidern / mit seinem Grubenpeil / Inselttasche  
vnd Zscherper / Dessen Leichnam bestetigen wir  
nun jetzt Christlicher weiß zur Erden / vnd begrä-  
ben ihn zu andern entschlaffenen seligen Christen/  
Müssen also mit dem heiligen David sagen / Im  
Psalm 118. Das ist vom H&Xren geschehen / vnd  
ist ein Wunder vor vnsern augen. Mirabilis DOMI-  
NVS in operibus suis.

Vnd wird diß forthin wunderbarlich vnd vn-  
gleublich zu sagen vnd zu hören sein / Zu mal an  
frembden orten / das man eine Leiche eines Bergk-  
mans zur Erden bestetigt / auch dabey eine Leich-  
predigt gethan / der 30. Jahr zuvor gestorben / ehe  
denn der Prediger geboren worden / Denn ich jetzt  
und Gott lob 31. Jahr alt bin.

**W**aber bey dieser Leichen begrebnus aus  
Gottes wort / was seliges vnd nützliches zu  
predigen / reymen sich die zwen verslein sein dazu /  
welche vns die ordnung gibt / in vnsern Psalm / den  
wir / wie jr wisset / in dieser jetzigen betrübten vnd  
fehrs

feyrlichen zeit/ wegen der Pestilenzischen feuche/  
die in vnser Nachbarschaft an etlichen orten gar  
sehr eingeriessen/ für vns genommen/ in Leichpredi-  
gten zu erkleren vnd zubetrachten/ Vns allen zu  
seliger Lehr vnd trost/ da Moses der Man Gots  
tes also saget :

Du HERR leisset die Menschen da-  
hin fahren wie ein Strom/ vnd sind wie  
ein Schloff/ Gleich wie ein Graß/ das  
doch bald welck wird/ das da frühe blü-  
het/ vnd des Abends abgehawen wird  
vnd verdorret.

In welchen zweyen Verschen Moses die kürze  
vnd vngewißheit des Menschlichen lebens in etli-  
chen Gleichnissen vns zubetrachten/ für die Augen  
stellet/ vnd auch zugleich mancherley weiß/ wie vñ  
wodurch Gott die Menschen aus diesem Leben  
abfordert/ anzeigt vnd fürbildet/ Davon wir dis-  
mal mit einander reden/ hören vnd lernen wollen/  
Gott gebe gnad vnd Segen dazur/ Amen.

Ihr sollet aber nicht vorgessen/ was vor wenig  
tagen ich bey den Begrebnis der Leich auch eines  
Christlichen Bergkmans vnd Obersteigers ge-  
sagt/ Nemlich die Summa oder Inhalt vnd ab-  
theilung

theilung dieses schönen Psalms/ denn er in drey  
Hauptstücke sich selber fein abtellet:

Erstlich/ da Moses schreiben vnd reden soll  
vom Elend vnd Jammer Menschliches lebens/  
sonderlich aber von der grossen gewalt vnd En-  
rauney des zeitlichen vnd ewigen Todes/ damit  
alle rohe/ Gottlose vnd sichere hertzen zu schrecken/  
vnd sie zur buß vnd besserung zu reitzen/ setzet er  
zuuor her ein sehr schönen trost/ vor alle bußfertige/  
fromme/ Christliche hertzen/ das sie darumb  
nicht verzagen sollen/ sondern ihre zuflucht zu dem  
lieben vnd trewen Gott haben/ der den Todt vnd  
alles vnglück in seinen Henden vnd gewalt hat.

Zum Andern/ beschreibt er mit vielen worten  
vnd gleichnissen/ den Jammer vnd betrübten zu-  
standt Menschliches Lebens/ Setzet auch die ur-  
sach dazu/ Woher es komme/ vnd warumb es ge-  
schicht/ das der Mensch/ Gottes herrlichste Ge-  
schöpff/ den grimmigen Todte müsse unterworffen  
sein/ mit einer sehnlichen klage/ vber die sicherheit  
vnd verachtung des meisten theils der Menschen:  
Ach wer gleubts das du H E R R so  
sehr zürnest/ Vnd wer fürcht sich vor  
solchen deinem Grimm.

Zum



Zum Dritten/ Fenget er an von hertzen vber  
solchen Jammer zu seuffzen/ vnd bitt/ Gott wolte  
sein grimmigen zorn messigen/ vnd es bey zeitliche  
Sterben bleiben lassen/ vnd nicht zum ewigen todt  
mit vns zürnen.

Diz ist also kürzlich der Inhalt dieses Psalms/  
Darnach habt ihr aus dem ersten Vers sollen be-  
halten den herrlichen trost/ Ob wir Menschen  
schon vnter allen Creaturen von wegen der Sün-  
de/ die elendesten sind/ dieselbigen nur dem zeitliche  
Todt vnterworffen/ Wir aber auch dem ewigen  
Todt/ das wir gleichwol den seligen vorteil haben/  
wir haben ein Gott/ der vns mit gnaden geneigt/  
vnd wenn wir in vnsern nöten Leibs vnd der See-  
le/ in der furcht vnd schrecken des Todes/ zuflucht  
zu ihm haben/ Sollen wir dennoch vnter seinen  
Schutz sicher sein/ Vnd wenn wir gestorben/ zu  
ihme kommen/ vnd ewig bey ihm bleiben/ Wie denn  
das Wörtlein Zuflucht / in der heiligen Sprach  
Habituaculum, eine Wohnung heist/ Welche vns  
Christus vnser lieber HERR zubereitet hat/ als  
Er denn spricht/ Johan. 14. In meines Vaters  
Haus sind viel Wohnungen/ vnd ich gehe hin euch  
die Stedt zubereiten. Also singen wir auch/ Mit-  
ten wir im Leben sind mit dem Todt vmbfangen/

B

Wo

Wo sollen wir denn stehen hin/ das wir gnad erlangen/ Zu dir dir Herr Christ alleine.

Wer aber vnd welchs derselbe Gott sey/ zeigt Moses auch an/ Nennet ihn ein Gott von Ewigkeit in Ewigkeit/ der ohn Anfang vnd Ende/ vnd der Schöpffer ist Himmels/ der Erden/ Berge vnd Thal/ vnd der ganzen Welt/ wie ihr denn von derseligen Erkendtnis dieses einigen/ waren lebendigen Gottes nechst weitleufftiger gehört habt/ vnd zur andern zeit auch mehr berichtet werdet/ Sonderlich aber/ habt ihr Bergkleut behalten sollen/ weil hie stehet/ Gott hab/ die Berge erschaffen/ das Er auch Klüfft/ Geng vnd Fletz drein verordnet habe/ welche er mit schönen geschicken voredelt/ vñ lest Erz vnd allerley Metallen darinne wachsen/ zur notdurfft vnd lust der Menschen/ Drumb den ihr daher gewiß sein sollet/ das Bergarbeit vnd Bergwerck barren/ auch eine Gott wolgefellige Nahrung sey/ dazu Er sein Segen sprechen vnd geben wil/ allen die zuflucht zu ihm haben/ das ist/ die ihn vber alles Golt vnd sein Golt/ fürchten/ lieben vnd vertrauen/ Vnd ob gleich ein Bergkman in solcher seiner Arbeit schaden nimpt/ oder gar im Berge vorfelle/ das dennoch Gott wisse vnd ihn sehe/ weil er sein Geschöpff von innen vnd aussen kennet.

Auch

Auch habt ihr in der andern Leichpredigt hören  
folgende zwey Verslein erkleren: Du lest den  
Menschen sterben/ vnd sprichst Kompt  
wider ihr Menschen Kinder. Da er spricht:  
Du lest sterben/ Damit begegnet er den gedan-  
cken dere Leute/die jetziger zeit pflegen zusagen/ wo  
ist der gewesen: Wo hat er's geholt oder bekommen/  
Das er krank worden vnd gestorben ist? Vnd gibt  
mancher es bald demie / Bald einem andern die  
schuld/ Da antwort nu Moses / Es kumpt vom  
HERREN/ Wie auch Christus sagt: Nicht ein  
Heerlein von eurem Haupt sol auff die Erde fal-  
len/ohne meines Vatern wille. Denn der Gott/  
der diesen vnd jenen lest sterben/kan auch mich vñ  
dich nach seinem Willen behüten/ wenn wir zu-  
flucht zu ihm haben/Vnd ob wol Frome der bösen  
vnd Gottlosen entgelten müssen/ so stehet doch hie  
ein wörtlein/ **MENSH**/ das heist an dem ort/  
Misericordia, Als wolt Moses sagen/ Non homo, sed mi-  
seria hominis moritur. Nicht der Mensch/ sondern  
das Elend vnd Jammer am Menschen stirbt/ Da-  
her wir denn in unsern Christlichen Grabliedlein  
singen: Sein jammer/ trübsal vnd Elend/ Ist ko-  
men zu ein seligen End/ Er ist gestorben vnd le-  
bet noch.

B. ij

Vnd

**Vnd sprichst/ Kompt wider Men-  
schen Kinder.**

Das legen etliche Lehrer also aus/ Etliche ster-  
ben/ andere werden dagegen wider geboren/ dara-  
uff denn die folgenden Wort gehen: **Vnd sind  
wie eine Nachtwache.** Nimpt ein gleichnis  
von Kriegsleufften/ da vorzeiten die Nacht in vier  
Wachen geteilet ward/ vnd alle 3. stunden eine  
wache ab/ die ander an gieng. Nimpt ihr Berg-  
leut von etwer arbeit ein gleichnis/ Auf einer Zech-  
oder gebeude/ das man städtlich treibt/ vnd gern  
wolte bald ein durchschlag machen/ geweltigen/ o-  
der sonst erfahren/ was man zu hoffen hat/ da leß-  
mans zu Sechs stunden ombgehen/ etliche fahren  
aus/ andere wider an/ vnd gibt immer einer dem  
andern das Feustel in die Hand/ Also etliche ster-  
ben/ andere werden wider geboren/ Vnd nach der  
Schicht kehren sie auch wider ab.

Es braucht aber Moses das Wörtlein Nache-  
nicht vorgebens/ Denn wie es in der Nacht fino-  
ster/ mühesam/ sehrlich vnd sorglich ist/ Also auch  
ist das Menschlich leben mit vielerley Finsternis/  
Zerthumb/ Sorg/ Gefahr/ furcht/ vnd derglei-  
chen ombgeben.

**Etliche**

Etliche andere Gelehrte verstehen diese Worte  
auch vom vrtail Gottes/ welches Er vber Adam  
gesprochen/ das so viel sol heissen: Werdet wider  
zu Erden/dauon ihr genommen seid. Wenn wir nu  
dessen vorstand dere wort behalten/so gehet der fol-  
gende/ Vers in vnsern Psalm sein darauff/ Da  
Moses sagt:

**Denn Tausendtz Jahr sind wie der  
Tag der gestern vergangen ist.**

Wil also den Gottlosen weltkindern/ein schweiß  
ausreiben/ die da dencken/ der Todt sey vber  
tausent Meilen/ sie sind noch jung vnd starck/  
können noch viel Jahr leben/ habe noch lange fei-  
ne noth mit ihnen/ Vnd wenn sie also ihr Datum  
auff das zeitliche Leben setzen/ dencken/ sie haben  
noch viel Jahr für sich/ so istz bey Gott als eins/  
Tausent Jahr so vergangen sind/ als der heutige  
tag/der heutige Tag aber als Tausendtz Jahr/ den  
bey Gott ist keine zeit/Omne tempus est nunc & ni-  
hil habemus de tempore nisi nunc. Wir haben von  
der Zeit nichts denn das gegenwertige Nu. Præte-  
ritum das Vorgangene/das ist nicht da/ Futurum,  
das Zukünfftige ist auch nicht da/ Vnd stehet der-  
halben vnser Leben auff dem Nunc, auff der gegen-  
wertigen Stund oder Augenblick/darinne wir le-  
ben/

leben/gehen/stehen vnd sterben/Darumb sich nle  
mand auff seine Jugendt/Gesundheit vnd Stercke  
vorlassen/Oder ihm noch viel Jahr zu leben die  
Rechnung machen sol/vñ ob einer auch gleich tau  
send jar lebete/so ist doch solche lange zeit vor Gott  
anders vnd mehr nicht/denn als hette er nur ein  
tag gelebet. Eine fliege oder mücke fleucht vorüber  
der Wind der fehret dahin/das Wasser fleust auch  
hinweg/vnd hat doch alles seine Zeit/die man mer  
cken kan/es sey so schnell es immer wolle/aber Tau  
sent Jahr vnd ein einiger Tag gegen einander zu  
setzen/wil sich gar nicht reymen.

Præterit ista dies nescitur origo secundi,  
An labor an requies, sic transit gloria mundi.

Der Heutig Tag fürüber geht/  
Vom Morgenden gar nichts versteht/  
Menschliche witz/ob er vns Ruhe  
Oder Arbeit werd bringen zu/  
All Ehr vnd Reichthumb dieser Welt/  
Ist ungewis/endlich dahin felt.

Es sind auch etliche Gelerte die ziehen diese  
Wort auff den tröstlichen Artickel von der Auff  
stehung der Todten am Jüngsten tag/das Moses  
so viel wolle sagen: Ob Gott der Allmechtige  
schon den Baraus lest mit den Menschen schlagen  
macht

macht ihn wider zu Erden/ davon er genommen  
ist/ wie der Töpffer einen topff der nicht gerathen  
ist/ wider vnter den andern Thon wirfft vnd knö-  
ret/ Also/ das sich ansehen lest/ als sey nun der  
Mensch gar zu nichte worden/ Das dennoch Gott  
zu seiner zeit durch die Posaun des Erzengels wird  
alle vnser Todten wider aus ihren Grebern ruf-  
fen/ wie Lazarum: **Kompt wider Menschen  
Kinder.** Vnd solches vmb sein selbst willen/ der  
sich auch des Menschen Sohn genennet hat. Vnd  
Paulus Ro. 14. sagt: Darumb ist Jesus Christus  
auch gestorben vnd von Todten wider erstanden/  
das Er vber Todte vnd Lebendige ein Herr sey.

Vnd dis wird so wunderbarlich zugehen vnd  
anzusehen sein/ das die Todten/ so vor Tausent jah-  
ren gestorben/ in ihrer Auferstehung nicht anders  
werden dencken/ denn als weren sie gestern gestor-  
ben. Macht also Moses hie eine wunderbare Ar-  
ithmetica vnd Rechnung / da er nicht das Hun-  
dert ins Tausendt / Sondern das Tausendte in  
Eins / vnd Eins ins Tausende / bringet / Denn bey  
Gott gilt Morgen als Heut / Heut / als Gestern /  
Gestern als der Tag / daran Adam geschaffen  
worden.

Sonderlich sollet ihr Christlichen Vergleute  
bey diesem gegenwertigen Exempel / den schönen  
trost.

trost wol fassen vnd fest behalten/ Das/ob wol an-  
dere Körper inn der Erden vermodern/ vnd zu  
Asche werden/dennoch Gott durch sein allmechti-  
ges/ krefftiges Wort/aus vnsern Steublein vnd  
Beinlein wird wider ein neuen Leib formiren vnd  
machen können/ Welchs er denn zum theil an den  
Bergkman beweiset hat/ dessen Körper er ganz  
behalten/ vnd wider heraus hat bringen lassen.  
Wer hette das gemeynet/denckt lieben Freund/ da  
die Alten/so seine Schlegelgesellen gewesen/haben  
müssen ablassen/welche sonder zweiffel/grosse müh  
vnd arbeit angewendet/ das sie ihn hetten mögen  
gewinnen/ Lang dünckt es vns sein Ein vñ sechzig  
Jahr/ aber für Gott ist nicht anders/ denn als  
were er gestern nur vorkommen. Also wird er auch  
vnser Leib wider aus der Erden herfür bringen/  
Vnd wenn einer tausent Lachtern tieff vorkommen/  
vnd tausent Jar vnter der Erden gelegen were.

Nun folgen mein lieben Freund die zwen Verso-  
lein/ da höret vnd gebet fleissig achtung drauff/  
denn die vorigen zwo Predigten/ habe ich etwas  
mit mehr Worten widerholen wollen/ wider mein  
gewonheit/ Weil sie zu dieser Leich vnd Exempel/  
auch zur Lehr vnd trost/sich sein hieher schicken.

Moses beschreibt (wie vorgesagt) die Kurz  
vnd Unbeständigkeit Menschliches Lebens/ in et-  
lichen



lichen gemeinen vnd bekandten Gleichnissen / mit  
welchen er zugleich auch anzeigt / Daß Gott man-  
cherley mittel vnd weisen habe / dadurch Er die  
Menschen aus diesem zeitlichen Leben pflegt ab-  
zufodern / da er mit Gott redet / vnd spricht:

1. H E R R / du lest die Menschen da-  
hin fahren wie ein Strom.

2. Wie ein Schlaff.

3. Wie ein Graß.

4. Wie ein Geschweß.

Vnd thut dis Moses darumb / weil er weiß /  
das viel Leut so sicher / vnachtsam vnd vorgessen  
sein / schlagens entweder in Wind / Leben inn tag  
hinein / achten des Sterbstündleins nicht / oder  
dencken sonst / es geschehe ohn gefehr / das einer also  
so / der ander aber auff ein ander weiß / dahin stirbt /  
auff das er solchs in gemeinen gleichnissen für au-  
gen stelle / vnd zu bedencken gebe jederman / sonder-  
lich sichere / ruchlose Leute / zur Erkendtnis des  
Todesstündleins zu bringen.

Du H E R R ( spricht Moses ) Lest die Men-  
schen dahin fahren / wie ein Strom.  
Wil so viel sagen: Jetzt ist eins frisch vnd gesund /  
Aber / ach wie bald ist's omb ihn geschehen / Denn  
S es hat

es hat der Todt die arth / wie wenn ein Wolcken  
bruch darnieder gehet / vñ daher ein gros Wasser  
fluth jehling geschossen kömpt / mit grosser gewalt /  
vnd reist mit sich dahin / was sie ergreiffet. Oder /  
nembt ihr Bergleute ein bekandter Gleichnus :  
wenn ihr ein Durchschlag machet / vnd das Was-  
ser mit grosser grausamer gewalt heraus bricht /  
vnd erseufft alles was es ankömpft / oder wenn et-  
liche Kesten mit Bergk eingehen / vnd erdrucken  
vnd verschütten eines / das er nicht weis wie ihm  
geschicht / als denn diesem Bergkman widerfaren /  
Cum impetu quodam & violento raptu, mit grosser  
gewalt / Wie denn auch manches junges / starckes  
Mensch der Todt schwer ankömpft / er arbeitet an  
ihm / thut ihm immer ein stoss nach dem andern an  
das hertz / bis es fracht vnd bricht.

Auch siehet Moses ohn zweiffel mit diesem  
Gleichnus dahin / das / wie ein gros Wasser offter-  
mals die Acker pflegt zuzureissen / vnd was darauff  
ist / von Getreid / Grass vnd auch Bäumen / zu  
verschwemmen vnd zuverschlemmen / darauff sich  
der Besizer des Ackers vnd der Früchte / hat vor-  
lassen. Also kömpt der Todt auch plötzlich vnd ge-  
waltsamer weis / vnd verschwemmet vnd verder-  
bet das Leben / Welches ein Mensch vormeynet  
gewis

gewis zu haben/ vnd lang zu gebrauchen. Dieses  
merckt vnd bildet euch fein ein ihr lieben Christen.

Zum Andern/ Spricht Moses: Sie/ die  
Mensch/ sind wie ein Schlaf. Ihr wisset lieben  
Freunde/ wenn einer schlefft/ vnd meynet er habe  
kaum ein Stunde geschlafen/ so ist die zeit vorü-  
ber/ Denn wir wissen nicht/ Wie vnd wenn wir  
einschaffen/ Wissen auch nicht/ wie wir im Schlaf  
leben/ So ist vnser Leben nur ein halbes Leben/  
Sintemaln wir vnser Zeit vnd Leben/ halb mit  
Wachen/ halb aber mit Schlaffen/ zubringen. So  
gehets nun mit vus auch zu/ Wenn manches  
Mensch kaum angefangen zu leben/ so stirbt es  
wider dahin/ Als wir denn je bisweilen an Kinder-  
lein in Mutterleib erfahren/ Vnd das mancher/  
Der sich gar wacker sein bedüncken lest/ von dem  
Schlaff obereylet wird/ das er dahin sinckt.

Auch wil Moses hiemit anzeigen/ das nicht  
alle mit gewalt vom Tode dahin geriessen werden/  
vnd sie der Todt schwer vnd hart ankömpt/ Son-  
dern/ etliche auch fein sanfft vnd still/ ohne regung  
einiges Glieds/ gleich als einschlaffen/ vnd wie ein  
müdes Kindlein/ oder wie ein Liechtlein ausleschen.  
Daher denn Christus vom Lazaro vnd Jairi  
Töchterlein/ so beyde gestorben/ sagt: Sie sind  
nicht todte/ sondern schlaffen. Wie vnd warumb/

aber der Todt ein Schlaf genennet/ vnd mit deme  
vorgleicht wird/ höret ihr zur andern zeit.

Auch heist dis Wörtlein/ welches Schlaf ge-  
deutscht ist/ hie an diesen ort. Somnium, ein Traum/  
mit welchen denn nicht allein Breuitas, die Kürze/  
Sondern auch Vanitas, die Nichtigkeit/ oder En-  
telkeit Menschliches lebens/ wird dargethan vnd  
menniglich für augen gestellet.

Nun wisset ihr zwar alle/ Was es für ein gele-  
genheit habe mit einem Traum/ dessen sich einer/  
so er im Schlaf fürkömpt/ entweder frewet/ oder  
darüber trawrig vnd erschreckt wird/ Wenn er  
denn erwachet/ istis Entelkeit vnd nichts/ denn es  
gehet vnd fellet beydes/ die fröligkeit vnd trawrig-  
keit/ die man im Schlaf vnd Traum gehabt/ dar-  
hin. Also frewet sich mancher Mensch in seinem  
Leben/ seines grossen glücks/ Ehr vnd wolgehens/  
vberhebt sich dessen/ ein ander ist zum höchsten bes-  
trübt/ jammerig vnd trawrig/ weis also derer kei-  
ner seiner frewd vnd leids/ eine mass noch Ende/  
Bald kömpt der Todt/ schneidet beydes ab/ Wie  
nun Syrach am 3 4. sagt: Es seind Narren die  
auff Trewme halten/ Also sind vielmehr die rechte  
Pur lautere Narren/ die sich allzu sehr auff ihr Le-  
ben/ glück/ stercke/ vnd gesundheit verlassen/ Da-  
vid im Psalm 3 9. Ach/ wie gar nichts sind doch  
alle-

alle Menschen / Sie gehen daher wie ein Schee-  
men / Sie machen ihnen viel vergeblicher vnrube.  
Nemet darzu freude. Merckt das wörtlein Schee-  
men / das heist / ein Bild das einem im Schlaß fürs  
kômpt / das verschwindet vnd vergehet denn sampt  
dem Schlaß. Eben also ist's vmb eines Menschen  
Leben / Es ist ein Bildnis / ein Schatten / darauff  
nichts zu halten / noch sich zu verlassen.

Das Dritte Gleichnis / nimpt er vom Grass  
oder Blume / Wie es auch Esaias am 40. braucht /  
da er spricht : Alles Fleisch ist Hew / vnd alle seine  
Herrligkeit wie eine Blume auff dem Felde.

Fleisch / merckt hie lieben Freunde / heist vnd ist  
der Mensch / wie er leibt vnd lebet / gehet vnd ste-  
het / vnd mag wol von betagten / alten Leuten ver-  
standen werden. Das wort Herrligkeit aber heist /  
Schön / Adell / Jugend / Kunst / Sterck vnd Ehre /  
vnd mag auff junge Leute gezogen werden. Nun  
wisset ihr / das das Grass vnd Blumen / auff drey  
erley weis vmbkômmen :

1. Wenn ihme der Safft vergehet / so ver-  
welcket es / Also / wenn einem Menschen das Hu-  
midum radicale , die natürliche Krefte vergehen /  
vnd vorsachern in Kleidern.

2. Wenn das Grass oder Blume / von Mens-  
chen Henden / vmbgebrochen / oder abgeriessen

wird/oder sonst von Würmen/Ungewitter/Platz  
regen/Schlossen/etc. Gleichertweis geschicht auch  
einem Menschen/ Wenn er von ein andern/oder  
sonst einer Kranckheit / vnd böser Luft / vnd dero  
gleichen/vmbgefellet wird.

3. Wenn der Grass Neder mit der Sense  
ober Grass vnd Blumen kömpt/ vnd dero vnzeh  
lich viel / plößlich in einem streich / vmbhewet vnd  
darnieder legt / Welchs den Menschen in Pestis  
lentzischen sterbensleufften / pfleget zu widerfah  
ren/vnd hauffenweis dahin fallen.

Merckts ja sein/ lieben Freunde / vnd lastis  
euch einbilden / Psalm 103. sagt David: Ein  
Mensch ist in seinem Leben wie Grass / er blühet  
wie eine Blume auff dem Felde / Wenn der Wind  
drüber gehet/ So ist sie nimmer da/vnd ihre stedte  
kennet sie nicht mehr.

Je höher das Grass wechset/ je neher kömpt  
ihm die Sense/vnd weuns auff's lengst gewachsen  
ist/so wirds auff der Erden weggehawen. Eben  
also gehets mit vns Menschen auch zu / Je elter  
wir werden/je neher kommen wir zum Ende/Vnd  
wenn wir meinen/ wir leben am besten vnd ge  
wishesten / so kömpt der Todt mit seiner Sense/  
wie er denn gemahlet wird / vnd machts mit vns  
aus.

Vnd

Vnd wie das niedergelegte Grass / verwelcket  
vnd verdorret / von der Luft vnd Sonnen hitze /  
vnd wird allgemach zu Hew. Also der Mensch /  
nimpt an seinen Leibes krefften / gesundheit vnd  
stercke / immer gemehlich ab / bis er gar ausdorret.  
Vnd wie ein Blume / wenn sie auff's schönste da  
stehet vnd pranget / in ihrer schönen farb / Also die  
Jugendt / verwelcket vnd gehet dahin.

Job am 14. sagt auch also: Der Mensch ge-  
het auff wie ein Blume / vnd fellet ab.

Jacob. 1. Ein Bruder der niedrig ist / rühme  
sich seiner Höhe / vnd der da reich ist / rühme sich  
seiner Niedrigkeit / Denn wie eine Blume des  
Grasses wird er vergehen / Die Sonne gehet auff  
mit hitze / vnd das Grass verwelcket / die Blume  
fellet ab / vnd ihr schöne gestalt verdirbet / Also  
wird der Reiche in seiner Haab verwelcken.

Lieben Freunde / last mich von diesem gemei-  
nen gleichnis mit euch reden / vnd achtets ja nicht  
für gering / wie es sonst pfleget zu geschehen / Vi-  
lescit quotidianum; Was gemein vnd teglich für  
augen / vnd im brauch ist / das acht man nicht gros /  
aber notwendige erinnerung vnd sehr nützlichen  
bericht haben wir daraus zu nehmen.

Ein Grass oder Blume / stehet auff's lieblichste  
vnd lustigste da / grühnet vnd blühet auff's her-  
lichste /

lichste/ Das auch Salomon in aller seiner Herr-  
lichkeit / nicht also bekleidet gewesen ist. Spricht  
Christus / Matth. 6. Und wenn auch schon kein  
Sensen oder Siechel drüber kömpt / So muß sie  
doch endlich von sich selber vorwelcken / vordorren  
vnd abfallen / Wenn denn ein Grass oder Blume  
abgehawen wird / so wechset doch ein anders. Man-  
ches junges / frisches hertz / welches sich auff sein ju-  
gend / sterck vnd gesundheit vorlest / wechset daher /  
vnd stehet wie ein schön Köselein / bald kömpt ein  
hitzig Fieber oder ander Seuch vnd franckheit / die  
reißt es auff / das also Jugendt nicht vor Sterben  
hilfft / Es geschicht offft / Heute rot / Morgen todt.  
Heute gesund vnd starck / Morgen im Sarg / vnd  
muß also eins dem andern weichen. Syrach 14.  
Gleich wie die grünen Bletter auff einen schönen  
Bawm / etliche fallen ab / etliche aber wachssen wie-  
der. Also gehets mit den Menschen auch / etliche  
sterben / etliche werden wider geboren. Also lieben  
Freunde / dencket diesem gleichnis nach.

Zum Vierdten / Vergleicht er die Behendige-  
keit vnd Vorgehligkeit des Menschlichen Lebens  
mit der Rede / da Moses in folgenden Verslein  
spricht / Nehmet lieben Freunde dis auch darzu:  
Wir bringen vnser Leben zu / wie ein Geschwek.  
Ein Rede oder Wort / ist ein schall vnd Hall / der  
bald



bald vorgehet vnd vorschwindet / Darumb der  
Poët Homerus die Wort / Verba alata nennet / vnd  
ein anderer / Ovidius sagt :

*Et semel emissum volat irreuocabile verbum.*

Gleich als hette vnser Rede vnd Worte Flü-  
gel / das sie schnell davon flöhen. Bedenckts wol lie-  
ben Freunde / es ist nichts vergenglichers als des  
Menschen Rede vnd Wort / so er mit dem Munde  
auspricht / Daher pflegt man zu sagen : Verba  
sunt, es sind Wort. Wie nun diese vorgehen / vnd  
nicht wider eingeschickt / oder widerbracht können  
werden / Also gehet vnd fehret auch vnser Leben /  
vnd die Zeit vnser Lebens dahin / vnd kan nicht  
widerbracht werden. Führen also / denck lieben  
Christen / alle augenblick mit der Rede oder Wor-  
ten / ein Zeugen vnser Sterblichkeit / vnd ein Pre-  
diger von der Vergenglichkeit aller Dinge auff Er-  
den / in vnsern Munde.

Darumb denn ein jeder vnter euch / der Zeit  
seines Lebens wol warnehmen / vnd sie Christlich  
vnd Gottselich / ohne Sicherheit zubringen sol :

**Denn es fehret dahin / als flöhen  
wir davon. Wie Moses ferner sagt.**

Die Jahr vnd Zeit vnser Lebens fleugt da-  
hin / als ein Vogel / vnd verleuret sich wie ein Was-  
ser

D

ser

ser/das in die Erde verleufft/oder wie die Zeit/ehe  
wir vns umbsehen / wie mancher pflegt mit Vor-  
wunderung zu sagen/ vnd klagen: Ach/ wo ist die  
Zeit hinkommen? Ich gedencke mir böse vnd gute  
Zeit. Vnd wenn einer gestorben ist/dünckt es vns/  
gleich als were er nur fürüber gangen/hetten ihn  
ein mal gesehen / So gar bleibt nichts davon hin-  
derstellig/denn der blosser gedancken.

Tempora labuntur, tacitisq; senescimus annis,  
Tempora mutantur, & nos mutantur in illis.

Die Zeit verleufft/wir werden alt/

Die Schön vergeht/ folgt Ungehalt.

Vnd wil der heilige Man Moses auch hiemit  
diß anzeigen/vnd zu erkennen geben / Dass man-  
ches Mensch ein zeitlang Bethriss ligt/oder sie-  
chert vnd sachert sich ab / ein anders aber gehet  
sehling vnd plözlich dahin / ehe man sichs vorsie-  
het.

Wil also Moses mit diesen gleichnissen vnd  
worten/ vns alle treulich vermahnet haben/ Wir  
sollen doch bedencken/wie so gar kurz/bösz vnd vn-  
gewiß / vnser zeitliches Leben sey / Wie bald vnd  
schnel es darumb geschehen ist / Wie denn der ge-  
dültige Job auch sehnlich drüber klagt/im 14. cap.  
Der Mensch vom Weibe geboren / lebet kurze  
zeit/ vnd ist voll vnruhe/ Gehet auff wie eine Blü-  
me/

me/ vnd felle ab/ Fleugt wie ein Schatte/ vnd bleib  
nicht. Denn/ was sind funffzig/ sechzig Jahr/ oder  
gleich mehr Jahr/ vnser Lebens/ gegen denen et  
lich hundert Jahren/ so die lieben Erzvater vor der  
Sündflut gelebt haben. Welchs denn Moses in  
folgenden Versen auch beklagt:

Vnser Leben weret siebentzig Jahr/  
wenns hoch kömpt/ so sinds achtzig jar/  
vnd weñs köstlich gewesen/ so ist es mühe  
vnd arbeit gewesen/ denn es fehret schnell  
dahin/ als flöhen wir davon.

Jacob der heilige Erzvater redet auch also/  
Genes: 47. Die zeit meiner Walfart ist hundert  
vnd dreyßig Jahr/ wenig vnd böse ist die zeit mei  
nes Lebens.

So lernet nun mein lieben Freunde/ das ihr  
diese gleichnissen vnd dinge / nicht ansehet wie ein  
vornünftige Bihe/ welches auch das Gras vnd  
Blumen hinein friesset / vnd das Wasser inn sich  
seuffet/ ohn alles nachdencken/ Inmassen denn wol  
viel Leute funden werden/ die ihm auch nicht viel  
anders thun / Sondern spiegelte euch darinnen/  
Lernet ewer Leben vnd ganzen zustand/ wie vnges  
wiß vnd vorgenglich es ist / darinnen erkennen/

D ij

Sintea

Einmal solches die Erfahrung bezeuget. Im  
Psalm 39. stellet vns David dis auch zubetrach-  
ten für/ Da er von sich selber redet/auch mich vnd  
dich lehret/ gleicher weis von vns reden: Siehe  
Herr/meine Tage sind einer Hand breit bey dir/  
vnd mein Leben ist wie nichts für dir/ Wie gar  
nichts sind doch alle Menschen/die doch so sicher  
leben. Darneben lehret vnd vermahnet vns auch  
David in diesen seinen Psalm/beten: Nun Herr/  
wes sol ich mich trösten? Ich hoffe auff Dich/  
Herr lehre mich doch/ daß ein Ende mit mir ha-  
ben muß/ vnd mein Leben ein Ziel hat/ vnd ich da-  
von muß.

Darnach sollen wir hiebey auch dis nicht  
vorgessen/ Sondern stets treulich warnehmen/  
daß Gott der Herr mancherley weisen vnd mit-  
tel habe/ dadurch Er den Menschen aus diesem  
Leben abfodert/ Einer kömpt vmb im Wasser/ ein-  
ander im Feuer/ der im Hause auff dem Betthe/  
jener auff dem Felde/ mancher Bergkman in der  
Gruben/ wenn ihn ein giftiger Schwaden er-  
greiff/ vnd erstecht/ oder vorselet sonst/ Wird von  
einer Lagerwand oder Bergk erdrückt/ wie diesem  
Bergkman vor Ein vnd sechzig Jahren widerfah-  
ren/ Also auch durch einen ichtlingen fall/ schedliche  
Waffen/franckheit vnd dergleichen/ Wie denn der  
Preo

Prediger Salomons saget / Capit. 11. Wie der  
Baum fellet / er falle gegen Mittag oder Mitter-  
nacht / auff welchen ort er fellet / da wird er ligen.

Seid derhalben allesampt trewlich gewarnt  
vnd vermahnet / daß ihr ewer wol warnehmet /  
auff das ihr euch selbst nicht verwahrloset / Betet  
stets herzlich : Für bösen jehen Todt / Behüt vns  
lieber HERR Gott. Lebt vnd gehet nicht in sichere-  
heit dahin / Sondern bedenckt ewer liebe Seelen /  
damit ihr die nicht in ewig Sterben vnd vorder-  
ben / führet vnd bringet / Dazu denn disz Selige  
mittel dienet / das ihr in ein busfertiges Leben tre-  
tet / ewere Sünden vnd Gottes gerechten Zorn  
erkennet / wie er denn jetziger zeit bey vns / sonder-  
lich aber bey vnsern Nachbarn / hin vnd wider se-  
hen vnd gehen lest / schlagets nicht in Wind / wie  
rohe / sichere vnd Gottlose Weltkinder pflegen zu  
thun / darüber denn Moses auch in diesem Psalm  
seuffzet vnd klaget :

Wer glaubts aber / das du so sehr  
zürnest / vnd wer fürcht sich für  
solchen deinem Grimm?

Ob aber wol schrecklich vnd betrüblich ist zu  
hören vnd zu bedencken / das wir armen menschen  
so viel vnd mancherley vnglück vnd Todesgefahr-

D iij

ligkeit

ligkeiten/ia dem Todt selbst vnterworffen sein müß-  
sen/so haben wir vns doch zu trösten/vnserß lieben  
HErrn Ihesu Christi / der alle Not vnd den Todt  
selbst auch gekostet vnd vberwunden hat.

Darauff fanget an von herzen zu beten vnd  
seuffzen: HErr/ lehre vns bedencken/ das  
wir sterben müssen / auff das wir flug  
werden. Vnd dann auch ewer Lebenlang/ den  
Glauben vnd gut Gewissen bewahret / bis an  
ewer seliges Ende / So könnet ihr Seliglich ein-  
schlafen / vnd des Todes gewarten / er komme  
durch waser mittel vnd Weg er wolte / er finde  
euch trawen im Haus/auff dem Felde/in der Brus-  
ben/ franck oder gesund. Darauff ihr denn inn  
ewern Grebern vnd Schlawfemmerlein / der all-  
gemeinen frölichen Außerziehung der Todten/  
köndt mit freuden erwarten / wenn der Oberste  
Steiger Ihesus Christus / euch durch den Erz-  
Engel / wird aus ewern Todes Schacht vnd  
Strecken/ausbochen/ zu einer ewigen Ruhe vnd  
Feyer / vnd was er euch hie auffgeschlagen / als  
denn bey Karlsgewicht/ redlich abzahlen/ in ewi-  
ger Freude vnd Seligkeit. Vnter dessen habt ge-  
dult / vnd nehmet für gut / wie euch GOTT thut/  
haltet an / als fromme / Christliche Bergkleute/  
gebt

gebt ewer Zupuff/ Hoffnung/ Glauben/ Gebet/  
vnd Gedult/ willig/ vnd laßt euch kein Wasser noch  
Besten/ das ist/ kein Kreuz/ trübsal/ Armut/ angst/  
Not noch Todt/ aufflessig machen/ Denn werdet  
ihr trewe / gleubige Gewercken bleiben / auff der  
Todtengruben/ wie ihr hie eine Zecher habt/ die also  
genennet wird/ das ist/ euch drücken vnd leiden/ so  
werdet ihr auff dem rechten Himlischen Heer/ ge-  
wisse Ausbeut/ die allbereit beschlossen ist/ heben/  
Nemlich/ ewiges Leben vñ Seligkeit/ vmb Christi  
willen.

Wer nun dis begeret/ wie ihrs denn/ ohne  
zweiffel/ alle werdet von herzen wünschen vnd  
Begeren/ der spreche mit gleubigen Seuffzen/ vnd  
herzlichen Worten/ Das vorlenhe vnd gib mir/ du  
mein allerliebster H E R R Ihesu Christe/  
mit Gnaden/ Amen/ noch ein mal ein.  
starckes vnd gleubiges  
Amen.




7  
Fa 1324<sup>a</sup> BK.

X220774J

n.c.







Za  
1324a

e Reichpredigt/

# n Begrebnis

tels eines Bergmans/

507. zu Ehrenfriedsdorff / im  
nand/vorfallen/ vnd vnvorsehens/ im  
eptemb: noch ganz funden/ vnd von  
schafft daselbst/ Christlicher weis  
den bestetigt worden/

Gethan/  
orgium Kaudte/ dazu  
es orts Pfarrer.



99.

erkiger Christen/zur Lehr vnd Trost/  
rgfleute/ auch zum gedechenis/  
Druck gegeben.

urf. Sechsischen Bergkstadt  
bey Georg Hoffman.

